

剛雙珠月明蘭腴金粉甘露玉瓶青建弱羅
漂芝流靈神梁丹散玄柯連紫珠玕朝結西
皇素盈可以衝躍朱霄飛虛玉清呼而吸之
以至冥靈漱而變之以入帝庭

黃炁陽精三道順行經云洞陽宮內有流火

庭其中有炎光八鍊自然玄丹

太上丹簡墨錄經云修飛仙騰超之道當授

神丹三十六水金液之術太清丹經

靈寶真一自然經訣云夫真舍利是金液之

凝精選丹之變化

太元真人茅君內傳云茅君各賜其二弟九

轉還丹一劑并神方一首各拜而服之仙道

成矣

道典論卷之四

太上妙法本相經卷上

已上原缺

姑五

辯夫曰清真無為無依無著毀之不辱譽之
不榮恭之不益慢之不損無損無辱無為而
已豈用教演豈須奉之豈勉行之豈徒勞之
不如閑靜隨其四氣終而用之人生無常去
留不停不如優豫乎弟子謂可修得大福廢
無可恃勉致神仙慢落三徒奉行靈祐辱之
禍至何期清真無為之任虛勉之教無益之
法乎

答曰夫清真者即是道也若人行之人行
之若人勉之人自勉之若人恭之人自恭之
若人奉之人自奉之何益於清真乎人自求
益非益清真人自求度非度清真人自數修
非清真數修人自求道非道求人是自以真人
先自勉苦後獲大樂先自恭奉後得真尊若
人辱道人自損之若人慢真人自慢之若人
廢道人自廢道若人毀真人自毀真何以故
人自罵響非響罵人人自惡真非真惡人人
自慢道非道慢人人自禍道非道禍人人自

滅道非道滅人人自毒道非道毒人何以故
譬如強弩射天其箭必遠是以人自射天非
天射人人自罵響非響罵人故毒不自運禍
不自生一由身口心行所招致也是以身者
三惡之根神仙之本一名良福田二名賦黎
園三名種子戶四名遠生門五名道之域六
名膿血村七名珍寶器八名瓦礫椀九名明
智室十名九夜昏人能知斯理可名為真人
功滿德亦就三界無極尊常樂無邊境迢迢
太上仙相好具萬種海智遊大千功德不虛
妄玄都計因緣聞而生好心萬劫無一緣隨
業落散去三塗是家因
辯夫曰如天尊所說人自求道非道求人人
自求度非道度人所以立教存文禁誡約束
若道不求度人不應設法加教以勸民物若
道不賴於人人豈何所務之將知道好於民
而貴其親
答曰道無親疎化及一切人自親道感而致
果禁誡加教非獨一人約及一切但人自求
禁誡束其身心約其口行是以聖人之道何

求乎有心者志之耳是故人能弘道非道弘
 人大道無為處神淡泊何求於人乎但人自
 弘非能弘道故道性徧養非獨一類何故專
 弘於人乎十方大千之國萬種形名悉以及
 之終不寄一類而化及也是以普徧於名豈
 獨弘之於人也何以故得知之道生天地置
 立陰陽布造日月安設星辰周天三百六十
 五度盈縮之數四時代謝毫分無失乃生民
 人萬類之形名匠成一切而獨弘之於人乎
 是故非獨弘人是以一切至士自求於道自
 求度之所以者何譬如於水人自求渡乃來
 渡水將知水不渡人人自渡之是故道不度
 人人自求道道不貪民民自貪道若道貪民
 則有親疎之隔若道貪度則有進退之性是
 以道性淡泊無有親疎亦無彼此慈恩子養
 平等一切何以故譬如生子子孩抱之時善
 恩愛之無欲遺棄小有不和馳追巫卜問其
 進止聞衰肝碎聞言錫悅乳鋪慈育進不長
 大豈其長成專志自計及目二親命不順從
 教不入懷色不和候言生攻擊惡聲遠近鄰

邑異目惡跡畏影隨遂急疾至死乃止形沒
 名流伊馨恒存若有一子二子言命色順善
 聞遠著此邑取風芳歌不輟於路口十子兄
 弟馨香善惡其用不同故道慈眾生亦與十
 二種恩等耳長成孝順其任隨意是故父母
 正知生養孝順由子道正知慈悲恭由百姓
 是以道慈眾生如母愛子無有親疎亦無貪
 物道慈母愛亦復如是
 辯夫曰愛恩更問餘辭如天尊所說道慈眾
 生如母愛子普哀一切無有遺棄竊見世間
 有苦厄之人進不得生退不肯死哀悲摧碎
 樹木啼泣六畜沾津飛鳥哀鳴視者忘身聽
 者酸零苦楚傷割不可處之道若大慈應哀
 念之矜濟救度免脫斯苦道不哀憐巨不矜
 濟推斯證驗將知道無慈悲恩及一切昔孤
 童之感河尸絕流棄嬰繫陽靈狩乳棄山河
 尚復矜感而況於道乎推緣之應將知道不
 有慈聖不有悲獨立不群無為之任也
 答曰一切眾生各有緣品若憂若悲若苦若
 惱先業定也如是河屍棄嬰所以流絕靈狩

乳者悉吾遺蚊龍絕流靈狩養嬰汝知不平
 所以知之水正知流行虎正知殺害何故不
 爾以吾故耳
 辯夫曰道若有感則無憂若道慈悲則無
 孤遺所以天下塗炭乃至滅身而無其殺將
 知無感無慈任化而已若當不爾道有二種
 一主貧苦孤厄災禍一主長壽富樂自然類
 族斯義當知有二也
 答曰一切眾生各有因緣長短苦樂居然定
 分無可移易先業既定報亦難准是以業果
 不安取報無殊譬如種植隨種而生豈有非
 類而生者哉貧富苦樂之果亦復如是所以
 者何一母生子乃至四五長短黑白正陋不
 同壽命貴賤各不一等將知先業所種不可
 移也如汝所問悉得聞知天尊曰夫也非汝
 所問則眾不知非汝所訪則眾不決今汝起
 一燈之照足充萬里之光汝若有滯未足為
 滯汝若有惑未足為惑
 辯夫曰受恩但六弊不知疑惑者多雖問數
 事得釋理趣餘滯比肩實心不盡意欲更問

天尊曰若有疑必問勿使抱惑懷疑以迷當年也

辯夫曰重受天恩如天尊所說一切眾生各有緣品貧富苦樂居然定分貴賤長短各受先業不審貧苦孤賤更可修善得福遇時不為即流轉涉惡而坐唯願天尊告其因緣所請得了今諸貧苦不及之人悉得聞知

答曰汝之所問甚要甚妙端坐諦聽為汝說之夫一切眾生若苦若樂若貴若賤一由先身所造因業今之所報若諸貧苦不及之人當知貧苦不可居處勉力修齋布施屈伸禮拜香水供養助人擔重路避老厄行齋勸化眾善備至當來悉獲太真之道而言貧苦乎貧人布施鉢兩當同國王百金苦中行道一禮當同一身出家何以故居貧不足應惜不惜施功高大不可稱量苦者無聊不應憶道而一禮者故可當慢士一世出家是故湯中出蓮華可謂難乎故業無常定作之皆報但患貧苦可知有道恒不及人但患孤賤不信因緣常居孤賤是以真人見是畏故行學修

道故成真人若苦惱眾生知於苦可惡知於樂可欲苦而行之亦與十仙同等何以故知苦行苦故終無苦覺賤不處故能去賤何以故一切眾生悉有樂性悉有苦性自一仙以下苦樂之性莫不居之自一仙以上永與苦別而況於道乎故一切眾生業無常定隨道便報豈有種類也

辯夫曰受恩願問餘解不審十方恒沙真人一切得道大聖眾為粟何蒸而生為習何道而致斯業乎得如今之報也

答曰十方恒沙真人得道聖眾者莫不悉從修本相是經之人也夫本相者大無不包細無不入廣演言教廣度天人無量亦如恒河沙之眾不可稱記亦如江漢浮橋摩劫水首以來度人無量不可勝數本相開化以來度諸聖眾亦復如是如汝修行經典齋戒不絕功德滿足亦與十仙等耳如十仙本悉因凡夫苦惱苦行至致光明也何況子之前業廣闊速乎今身聰茂淵溢解了玄宗其功等於崑崙其德同於淵海十仙之期毫分不失何

以故子兩影相照者其間普滅遊乎上清之道金書玉隱紫解注名亦如影生前暉定於中陽子之德宗亦復如是

辯夫曰如是如是得道聖眾去如恒河沙之數無有返者今始修學亦如恒河沙數有終期而無盡也若當不盡去不休停若當有盡因緣即滅唯願分別

答曰如是如是去如恒沙不足為多九天數終乾坤灰揚爾時螻蟻一切蠕動皆發善心動經千天得道之眾未足為多蠕動皆發善心萬類之眾普遷七寶玉京紫微之中動經千天得道之眾未足為多是故空不可滿虛不可實故多不可思議之場也珠口納眾由不盈狹長樂廣包由不充徧而況於空虛乎辯夫曰受恩更問餘解如天尊所說劫末運終普皆成道無有遺留展轉化生者當爾何假於教何求於師何勞於懃何託於法徒自涉苦熱耳不如端拱自求生養難泰之饋矣答曰夫百年之苦不如一年受樂而死羸布十端不如色錦一丈鳥雀豈不受命三百不

如人受一年居鐵百斤不如金錢十文欲許千金不如交粟一斛待百世之王不如足食之貴譬如博奕貴其前出先者為勝終不留負留負者即是身之累也擔愧負累雀業以償東作失利遂致困乏留負子孫恒居不足託命債力投身死地男卑女賤人不仇之博奕之負乃至如斯所以者何博之前出者譬成道真留負者譬三塗是以真人早行修道令得八解之果常樂無為其德無量何以故譬如種植先種前食中種中食晚種晚食不種無所收食若遇顛災無可收拾主施散給爾乃得之不造而望果者亦復如何以故譬如百歲任重豈可越投十年罔圖豈可竟之遙望十年之甘時當昧也指日而須者未可致是以真人知未望之望故絕望而獲望知未果之果故絕果而得果何以故譬作田耨恃天而雨者將不遂其願不如先治渠堰引水溉灌定可獲也天非不無雨但恐炎陽而敗饑饉艱辛命不延久劫末非不無道但恐三塗而不可免脫是以真人畏是故故先

求道其真既崇永無憂敗常生無為為於無為之為任於無任之任託於無託之託寄於無寄之寄居於無想之想處於無著之著是故聖人高於初業貴於先功何以故貴於先功尚於學士也三元九厄殃災巨遇有能遜心修道者善得免脫也是以聖人尚於先功貴於初業若有志於道者悉由初業也初業者是罪之因先功者前舉之功故貴功而尚業乎不貴不尚者與諸六畜同之所以者何六畜不知有道豈識功業之妙理故同六畜耳

辯夫曰受恩顧問餘解世有學士受師教法修行道德動經年劫而不成立復有學士修行道德未必多年而致太真無為之任者何答曰學士修道貴在會理多年而無成者心不會理譬如跛癩規於萬里之所日涉不過十里三年乃達其所趣復有一人俱與一處同涉一趣及其馳涉日行三百不過月旬而達所趣學士心會亦復如是譬如飛步難為及也何以故一人乘龍一人步涉豈可相逐

里趣同所飛涉不等學士志道不同一等或形染道法心存有中或假真專偽妄淺祕要或言如真人心懷良賤或口誦明文心不專一或身居上學迷貪財色或矯假高貴威赫愚俗如斯之士定入三塗道在何處未熟之間並可逐侶雖行世界即是行尸獄也一切學士豈得同之所以者何譬如辯意一人作意十人辯之一人作難十人射之值之者若一若二射著者若兩若三其意豈不同一但所見不同會以不會亦復如是

辯夫曰受恩顧問餘解竊見世中十人五人同時出家隨心所好各奉一師修行道德不捨晝夜一師之徒悉得五通之果一師之徒無有異悟若依其年年則同之若依其懇懇勞等所一師之徒獨進一師獨不進

答曰師有明闇故有進否所以者何師者即是道之門戶也若有明師善知經義觀今玄宗辨道冥趣教授禮拜勸誨如法依文演授將入法會約之以禮尊之以律日日增受形殊見等若遠若近尋之明了兢懼威神恒恐

馳趣日夜翹勤專守不移系和神素形魂暢
悅神暉授引擁將真道孔務三真將感玄應
敷教迴景猛狩依附三師進焚加研轉神五
通之果因功而得將來定受玄紀無為之果
也所以者何明師者百道之關梁譬如入海
採於眾寶先知投簡名刺之法牢船鐵深張
帆設軒之詣寶所綴沉浮船乃發沙石砲礮
營墳燧取若多若寡來往莫蹶奉逐明師亦
如是何以故譬如萬萬里重嶮之中甚有金
丹柔琉八芝有能進到取而服之者命同天
地終不橫天有聞之者莫不傾俟人人應涉
取而服之但患嶮阻悉滯莫進無不返者聞
師之徒亦復如是柔琉非不有之但患悉滯
不達空中非不有真但患莫然無趣所以者
何譬如漏船渡水水滿必沒湍浮廣水中流
必沉遠所八芝重嶮必返入海採寶不投簡
刺舟船必翻師徒無德亦復如是是以真人
終不自師故能成師終不自明故能成明終
不自我故能成我終不自智故能成智終不
自見故能成見終不自高故能成高終不自

德故能成德終不自彰故能成彰終不自用
故能成用終不自任故能成任終不自大故
能成大終不自美故能成美終不自真故能
成真凡此十三真人所不取夫學士之法甚
須良釋付思行業未使未任為任後必成患
未匠為匠後必傷手是以真人不尚其名其
名顯矣不貴其譽其譽遠矣故道士務於道
勤於德託良徒追明師講化律誦經籍習仙
氣修齋直思神明檢口過東五心逝六情背
陰賊向生門行大慈念一切哀孤老矜寒貧
斯學士之上業賢者之福田自非明師之約
法何能如斯是以明師者道之門戶也何以
故其師明則法教行其師闇則法教不成是
以一師之徒獲五通之果一師之徒而無悟
感也

辯夫曰受恩願聞餘解第五夫學士十一斷殺服藥得
道以不

答曰得問曰何如長齋對曰不如問曰長齋
何如誦經對曰不如問曰誦經何如坐思對
曰不如所以者何去教之士正念藥耳藥炁

充足正滿千年則終方更受生方與始學同
耳長齋之士日計其功功滿一萬飛昇太空
下超四道一仙齋直功滿德就遂成無為至
真之道乎長齋之果不可思議若有誦經之
士亦不可思議所以者何讀經之士計文為
功一字一功功滿三千名列上清而況廣看
卷自長執文籍乎何以故經者道之教若讀
而依行者即是道之面勅也是故經者經緯
衆生去貪欲之患其患既除煩惱災盡其災
既盡五毒亦滅衆惡既消萬善同會運邈群
仙得為無上之果是以真人寶經而珍之愛
樂如妻子十仙由斯起經最為無為首學士
之為道亦不可思議所以者何思之言念念
之言定定之言不動不動者即用十仙人也
何以故闕所門故絕於不正之想廢於非意
之意神亦既定志亦難奪是以真人修行故
能定修經故能正修齋故能長仍行而不改
故能成至真暫時不去離功滿無上寶道遙
紫金場常樂必致身一切恒沙衆悉修三業
因功集綜十方岩岩太上仙故當行如是善

著亦如前蓮華足下生相好恒自然

辯夫曰受恩更問餘解如天尊所說三業其功無量乃與十仙同論不可思議不可稱量不審餘業有報不

答曰有問曰如有學士不修三業廣修宮觀

供養之具悉以布施得何報乎答曰天堂自然報問曰受報既已寄何所居答曰寄於無

常之寄居於無常之居何以故若處報中行三業與上道同論得計無上果若處報不修三業下落於人鳥中或落三塗中故寄於

無常之寄居於無常之居問曰不造四業專於修壇布散得何報乎答曰天廚地藏受報

問曰報盡已訖受何所寄居何所任答曰亦無常所寄何以故若報中當修三業其果無

上若不爾者隨業墮落故無常所寄

問曰如有志士不修五業專於道化不營俗事得何報乎

答曰四道難階漸修定也何以故斯人即在家道人故若報中修行三業其功高於三業上與可進之益下與進仙齊倫是以真人廣

建福田無不果也何以故真人具種造故具種報具種慈故具種愛以造宮觀故今得感

官殿也以修壇布散故今得天廚飲食也以道化人故今得無礙智以斷五辛故今得清淨身以斷甘肥故今得無為形以好禮拜故

今得無上尊以好不煞故今得長生壽以好讚善故今得千種聲以行忍辱故今得麗妙形以不毀辱故今得眾愛敬以恒救濟物今

得無病患以心無愛憎今得平等智以樂救眾生苦今得神口良以好莊嚴法今得紫金身以口不妄說今得蓮華舌以不逝絕故今

得具種相一切不可及悉由先造長真人行如是超越太上卿汝但行如是前亦不足長功集運湊會兆劫如電光道遠大羅外坐視

大千方毫釐若掌珠去就先良如斯之德業悉由萬行將一善不修備十仙乘高岡勤

苦不辭憚普會至真場

辯夫曰受恩顧問不解如天尊所說十方恒河沙之眾悉從三業而起不審國主侯王復作何業得為人尊其父亦崩而子繼之所以

者何若計因緣則不相承若計種類則有斷絕其中差互疑惑不盡唯願天尊告其因緣所從而來

天尊答曰善哉如國主侯王所以世封以先業所鍾同受其福

問曰所以斷絕若有福之人同生受福應當姓嗣不絕若不爾者則無因緣

答曰一切貴賤各有緣品若先業同故同一福而受其性也何以故譬如佃田隨種而種因種而生若改其種則改種之是故一地可

易百種而況一封改絕乎

辯夫曰受恩顧問餘解天尊演說斯義世之無有不審本相從開化以來為經幾劫為度

幾人為度有緣為度無緣唯願天尊告其因緣所從而來

答曰善哉善哉如五自本相妙經十四吾所宗受動經恒沙劫數度人無量無邊不可記稱恒與人

運同生與運同滅海水沾錄由不知之如日月登明王之前得道大聖眾亦如恒河沙之數莫不悉從本相受學而致道也是以本相

者諸經之元王與道轉輪不可思議夫聞天尊所說悉同受解便大歡喜即起三禮於天尊前長跪稽首而作偈曰

千載因緣會 運生落斯形 值遇無上尊 辯說至真經 請問無不解 道隨三業生

諸善寄無常 沅轉亦無停 學士奉明神 法教日以明 指求無為跡 果感十仙名

師徒普闇昧 萬劫不彫成 盲人涉萬險 必墜于大坑 一師大聖眾 悉超至真經

今自諸來者 萬善必令行 不避國王侯 莫不遜心精 富貴如水泡 不足博為榮

得道紫金體 本空無為成 一切貴賤徒 是非在心精

太上妙法本相經卷上

第五

十五

太上妙法本相經卷中

普言

姑六

道匠天地德崇萬物含養無窮功充含氣百獸神蟲知道所生猶尚依親悉無害想而矧神仙之念乎外道不宗不知百獸神蟲之心

土木可移外道不受將知心去身往神形永止所見殊異故神形離索不同而居夫為道也身心力行同時而到不妄不想專執不動

天雨飛石火生熾地地為之出黃泉黃泉湧沸出終不斃顧斯是志士之尚道業也樂居

於勞山徒有三千天魔發山打鍛槌斷亂墜其側樹木摧折山崖崩缺千萬段數亦如飛

雪石不能傷完端不易樂心不搖存念如故復有炬燄百數競來恐赫林木焦燃蕩無苗

果乍來乍縮亦如海譬樂志靜然安心由閑頗無驚擾其念巨解其想逾明不煩不懼道

心如故將取之於無為不言之說唯與我子不名之教唯與我息何以故不言不名即體

空無斯之侶者道心獨起非世庸之所及也悉是天上來外道倒見起教於實亂誤群徒

入火者衆而況體空無乎若爾者即是我種子非種非子何能知空無之為主何以故道匠天地不以為我為父德崇萬物不以為我為母而況獨知空無之所從也是以真人知空之可宗故習空得空知無之可特故修無得無

若知不言不名者故知天人降生於世化人也抱道而用負陰而行賴空而利因無而功一切含氣由不知所從之謂言自然謂言因

緣若苦若樂若富若貧若貴若賤悉有斯言真知自然不信自然真知因緣不信因緣亦

如小兒習語知導不知義知學不知理吾故學父之教宣於萬方勤而不辭勞而無功恒

以功成身退以遂天道故去彼取此道強若折德弱若雪以取中和御於上下故

高者抑之下者舉之此道之所用若剛則止若強則折不折不折乃肯常全若剛若強身

無可恃道在何方是以道人取於中和去於剛強抑高舉下水性養身浸潤玉宮始終無

患是以真人無病以百姓為病故曰病病不憂不患吾有何患